

- 26 Ir helme und ouch ir brünne si bunden uf diu mare:  
sich bereite von dem lande manic riter starc.  
dô gie von Troneje Hagne, da er Kriemhilde vant:  
er bat im geben urloup: si wolden rûmen daz lant.
- 27 'Wol mich,' sprach Kriemhilt, 'daz ich ie den man gewan,  
der minen lieben vriunden só wol tar vor stân,  
alse min hêr Sifrit tuot den friunden min.  
des wil ich hôhes muotes,' sprach diu küniginne, 'sin.
- 28 'Lieber friunt, her Hagene, gedenk et an daz,  
daz ich in gerne diene und noch nie wart gehaz.  
des lâz mich geniezen an minem lieben man.  
ern sol des niht enkelten, hab ich Prûnhilt iht getân.'
- 29 'Ir werdet wol versüenet her nâch disen tagen.  
Kriemhilt, liebiu vrouwe, já sult ir mir sagen,  
wie ich iu müge dienen an Sifride, iworm man.  
daz tuon ich gerne, frouwe: baz ichs nieman engan.'
- 30 'Ich wære ân alle sorge,' sprach dô daz edel wip,  
'daz im ieman nâme in sturme sînen lip,  
ob er niht wolde volgen siner übermuot,  
só wære immer sicher der degen küene unde guot.'
- 31 'Wrowe,' sprach dô Hagne, 'und habet ir des wân,  
daz man in müge versniden, ir sult mich wizzen lân,  
mit wie getânen listen sol ichz understên?  
ich wil im ze huote immer rîten unde gên.'
- 32 Si sprach: 'du bist min mâc, só bin ich der dîn.  
ich bevilhe uf triuwe dir den wine min,  
daz du wol behüetest mir den lieben man.'  
si seit im kundiu mære, diu vil bezzer wærn verlân.
- 33 Si sprach: 'min man ist küene, dar zuo starc genuoc.  
dô er den lintdrachen an dem berge sluoc,  
já badet sich in dem bluote der recke vil gemeit,  
dâ von in sît in stürmen dehein wâfen nie versneit.
- 34 'Idoch bin ich in sorgen, swenne er in strite stât  
und vil der gêrschütze von helde hande gât,  
daz ich dâ verliese den minen lieben man.  
hei waz ich grôzer sorge dike umb Sifriden hân!
- 35 'Ich melde ez uf genâde, vil lieber friunt, dir,  
daz du dîne triuwe behaltest ane mir  
dâ man dâ mac verhouwen den minen lieben man.  
daz lâze ich dich hâren: dêst uf genâde getân.
- 36 Dô von des drachen wunden vlôz daz heize blout,  
dô badete in dem bluote sich der riter guot.  
dô viel im zwischen herte ein linden blat vil breit.  
dâ mac man in versniden: des hân ich sorge unde leit.'